

## 23.13 RAPPORT DEPUTATE PUBLIKASIES – ALMANAK (Art 145)

- A. Ds W Vogel lewer die Rapport.
- B. Die Rapport word staande die Sinode afgehandel.

### C. RAPPORT

#### 1. Opdrag

Kyk Acta 2012:443, 3.1; 465, 466.

- 1.1 Die *Almanak* word weer uitgegee en 'n redaksie moet aangewys word (*Indien moontlik, moet die Redakteur een van Potchefstroom se predikante wees*) met die opdrag om: Die *Almanak* met dagstukkies uit te gee.
- 1.2 Die Deputate vir Publikasies gaan daartoe oor om die *Almanak* nie alleen in Afrikaans te publiseer nie, maar ook in ander tale.
- 1.3 Die Afrikaanse of selfs enige ander taal uitgawe kan elektronies aan kerke beskikbaar gestel word, wat dit dan self kan versprei.
- 1.4 Die Deputate Publikasies moet dit ondersoek of die Dagstukkies nie **ook** alleen gebind kan word en in boekvorm verkoop word by boekwinkels nie. Dit is bo en behalwe die *Almanak* wat net so bly soos ons hom ken. Dit kan net 'n positiewe invloed hê om op hierdie wyse iets van die Gereformeerde Kerk op ons winkelrakke te kry. Die boekies met Dagstukkies kan selfs in ander tale, ook swart tale vertaal word om meer mense te bereik. Besluit: Aan die Beskrywingspunt word gevolg gegee. Verwys na Deputate vir die uitgee van die *Almanak* om te ondersoek en indien uitvoerbaar, te publiseer.

**Besluit: Punte 1.1 tot 1.4 kennis geneem.**

#### 2. Sake waarvan die Sinode kennis neem

- 2.1 Die *Almanak* het jaarliks verskyn
  - 2.1.1 Die *Almanak* het jaarliks verskyn met dagstukkies. Die Deputate wil graag aan die Sinode rapporteer dat die *Almanak* met dagstukkies in die lig van korrespondensie wat ontvang is, en volgens die beskeie oordeel van die Deputate, baie goed ontvang is in die kerkverband en daarbuite. Die Deputate wil ook graag 'n woord van besondere dank uitspreek teenoor al die predikante wat op 'n besondere wyse saamgewerk het om van hierdie publikasie 'n sukses te maak.
- 2.2 *Neem 'n besluit oor die opgehoopte fondse met inagneming van die volgende aanbeveling van die Deputate:*
  - 2.2.1 Die oplaag van die *Almanak* was vir 2013: 12 650 eksemplare, vir 2014 was dit 12 500 en vir 2015 word 'n oplaag van 10 000 beplan. Omdat die projek so geseënd is, het die Deputate 'n aantal eksemplare aan Gereformeerde instellings soos ouetehuse en kinderhuse gratis beskikbaar gestel. Die indruk wat die Deputate het, is dat Kerkrade meer geredelik al die *Almanakke* wat hulle bestel van die hand sit en dat dit nie in konsistories ophoop nie.
- 2.3 Die Deputate is dankbaar om te rapporteer dat na die drie jaar 'n goeie wins getoon kan word soos blyk uit die Finansiële state wat aan die Sinode beskikbaar gestel is. Die Deputate was in die lig van die finansiële situasie daartoe in staat om die prys van die *Almanak* vir die laaste twee uitgawes laag te hou, waarvoor ons baie dankbaar is.

- 2.4 Die Deputate se beleid is om al die inligting wat beskikbaar is van al die Gereformeerde Kerke in die *Almanak* te plaas. Ongelukkig moet ons rapporteer dat die inligting nie altyd volledig is nie. Alles word gedoen om volledige inligting te verkry.
- 2.5 Dit is die beleid van die Deputate om jaarliks huldeblyke van predikante wat oorlede is, te plaas.
- 2.6 Die Deputate plaas van tyd tot tyd 'n volledige lys van "Kerke en hulle predikante". Sodanige lys is weer volledig in die 2015-uitgawe van die *Almanak* geplaas.
- 2.7 Die Deputate poog om die standaard van die *Almanak* jaarliks te verbeter sodat dit 'n uitgawe sal wees waarop alle lidmate trots is. Ons wil verskeie lidmate en predikante bedank vir insette en wenke wat hulle vrymoedig na elke publikasie aan ons deurgee om ons daartoe in staat te stel.
- 2.8 'n Rubriek in elke uitgawe van die *Almanak* is die Ruit waaraan 'n groot aantal lidmate deelneem. Die Deputate bedank dr Hennie van Wyk wat hierdie rubriek behartig.
- 2.9 Die *Almanak* is jaarliks by die Streeksinodes afgelewer vir verdere verspreiding deur die onderskeie kerke. Die Deputate maak ook gebruik van posversendings vir verafgeleë bestemmings wat moeilik met padvervoer bereik kan word.
- 2.10 Die Deputate wil hulle dank uitspreek teenoor adverteerders wat in die *Almanak* adverteer om sodoende koste te beperk.
- 2.11 Die Deputate wil graag hulle dank uitspreek teenoor die personeel van die Administratiewe Buro en by name srs Wymie du Plessis, Petro Kroeze en Joey Fourie vir die insette wat hulle maak om elke jaar die *Almanak* die lig te laat sien.
- 2.12 Ons wil ook graag vir Angie Mokobi en Anna Leeuw bedank vir hulle hulp om die versending van die *Almanak* moontlik te maak.
- 2.13 Die Deputate het aan alle kerke 'n e-pos gestuur om 'n behoeftebepaling te doen oor 'n Engelse en ander tale Almanak. Terugvoering is van 5 gemeentes ontvang waarvan ongeveer 30 eksemplare in Engels as 'n behoeftebepaling deurgegee is. Die Deputate het besluit om nie hierdie weg op te gaan aangesien die drukkoste van 30 eksemplare te hoog was (kyk opdrag 1.2).
- 2.14 Die Almanak is elektronies op die GKSA-webblad beskikbaar. Oorweging word geskenk om 'n elektroniese weergawe teen 'n verminderde prys, bv soos die *Kerkblad*, beskikbaar te stel. Die Almanak word al vir die afgelope aantal jare elektronies op die webblad beskikbaar gestel (kyk opdrag 1.3).
- 2.15 Die Deputate het met die CJBF-deputate in gesprek getree om die Dagstukkies van die Almanak te publiseer. Tydens 2009 is daar 'n aparte boek met Dagstukkies van die Almanak gepubliseer. Die boek het nie verkoop nie en moes die CJBF-deputate die boek gratis uitdeel. Die Deputate Almanak gaan weer moontlik saam met die CJBF-deputate die Dagstukkies van Almanak 2015 in 'n aparte eksemplaar publiseer wat vir Bybelstudie gebruik kan word (kyk opdrag 1.4).

**Besluit: Punte 2.1 tot 2.15 kennis geneem.**

### **3. Sake waaroor die Sinode besluit**

Die *Almanak* word weer uitgegee en 'n redaksie moet aangewys word (*Indien moontlik, moet die Redakteur een van Potchefstroom se predikante wees*) met die opdrag om: Die *Almanak* met dagstukkies uit te gee.

**Besluit:**

1. **Goedgekeur en neem kennis dat die dagstukkies in groter skrif op CJBF-webwerf beskikbaar gestel word.**
2. **Die redaksie ondersoek instel om elke paar jaar 'n boek met dagstukkies uit die *Almanak* in Engels te druk.**